

## Inatsisissatut siunnersuummut oqaaseqaatit

**Oqaaseqaatit nalinginnaasut***1. Siunnersuummut tunuliaqutaasut*

Inatsisartut 2004-mi ukiakkut ataatsimiinneranni oqaluuserisassani immikkoortutut UKA 2004/68-itut aalajangiunneqarpoq tipsernermit lottornermillu iluanaarutinit agguaassisarneq pillugu inatsisartut inatsisaat allanngortinneqassasoq, taamaalilluni meeqqat inuusuttullu peqatigiiffiinit tipsernermit lottornermillu iluanaarutinit Sorlak agguaassisarnissamut piginnaatinneqalerluni. Taamaalilluni Sorlak Kalaallit Nunaanni Timersoqatigiit Kattuffiannut aamma Team Grønlandimut timersornernut tamanit peqataaffigineqarsinnaasunut, innarluutillit utoqqaallu timersornerat ilanngullugu, kiisalu piukkunnaatillit pikkorinnerillu timersornerinut tapiissutinik agguaassisartunut naligiissinneqalerpoq.

Meeqqat inuusuttullu peqatigiiffiinit aningaasat agguataarnissaannut suliassat tamaasa Sorlammut nuunneqarnissaannik aalajangiussinermit ataqatigiissillugu Naalakkersuisut allannguutinit arlalinnik siunnersuuteqarnissaq naleqquttuutissimavaat, taakkulu ilaatigut tipsernermit lottornermillu iluanaarutit agguataarnissaannik Namminersornerullutik Oqartussat akisussaaffigisaannit ukiunit siullernit arfineq marlunnit misilittakkanik tunngaveqarlutillu nukinnik atuinerup annikillissarnissaanik siunertaqarput.

Naalakkersuisuusimasut siunnersuut manna UKA 2005-imi saqqummiuppaat. Inatsisartunut qinersisoqarnissaanik nalunaaruteqartoqarmat siunnersuut atorunnaarsinneqarpoq. Kingornatigut siunnersuutip oqaasertai allannguuteqarput erseqqissaasoqarlunilu.

*2. Siunnersuummi immikkoortut pingaarnerit*a) Inatsisit atuuttut

Pinnguaatit, eqqorniaasitsinerit eqquiniunnerillu pillugit danskit inatsisaat naapertorlugu Dansk Tipstjeneste A/S-ip tipsernermit lottornermillu iluanaarutinit ukiut tamaasa Kalaallit Nunaanni kaaviiartitat sinneqartoorutai Namminersornerullutik Oqartussanut nuuttarpai. Pissarsiassanik taakkuninnga agguaassinermut inatsisitigut tunngaviuvoq Tipsernermit lottornermillu iluanaarutinit agguaassisarneq pillugu Inatsisartut inatsisaat nr. 13, 11. novembari

2000-imeersoq, inatsisartut inatsisaat nr. 4, 21. maj 2004-meersukkut allanngortinneqartoq.

Inatsisartut inatsisaata nassatarisaanik timersornernut tamanit peqataaffigineqarsinnaasunut, innarluutillit utoqqaallu timersornerat ilanngullugu kiisalu piukkunnaatillit pikkorinnerillu timersornerinut tapiissutinik aningaasat agguataarneri Kalaallit Nunaanni Timersoqatigiit Kattuffiannit aamma Team Grønlandimit isumagineqartarput. Inatsimmi meeqqanut inuusuttu-nullu siunertanut aningaasat agguataarnerisa suliassartaanik Sorlammut nuussinissamut assi-gisaanik periarfissaqanngilaq, soorlutaaq suliniaqatigiiffiit ilaasa agguataarinermik suliamik tigungmiaqarnissamik kissaateqarunnaarneranni imaluunniit tigungmiaqarsinnaajunnaarneranni sunik pisoqarnissaanik aalajangersagaqanngitsoq.

Inatsisartut inatsisaanni § 4 naapertorlugu Naalackersuisut Tipsernermit iluanaarutit pillugit maleruagassiisartussatut suleqatigiissitaliamik pilersitsissapput. Tipsernermit iluanaarutit pillugit maleruagassiisartussatut suleqatigiissitaliaq, kultureqarnermut, ilinniartitaanermut, ilisimatusarnermut ilageeqarnermullu, isumaginninnermut, peqqinnissamut, kiisalu avatangiisinut pinngortitamullu naalackersuisunit qinerneqartunik arfinilinnik ilaasortaartoq allaffissornermut, naatsorsuutit tunniunnerinut, kukkunersuinerneq aammalu tapiissutisinnissamut piumasagaataasunut malittarisassat aalajangersarneqarnerinut atatillugu Naalackersuisunut siunnersuisartuullunilu inassuteqartartuussaaq. Suleqatigiissitaliamut allattoqarfeqarnikkut ikiuuttartussamik Naalackersuisut atugassiisarput. Suliap taassuma agguaqatigiissillugu ukiumut sapaatit akunnerinik marlunnik-pingasunik sulisorisamik ataatsimik atuiffiusarnissaa naatsorsuutigineqarpoq.

Naggataatigut tigusisussanut tipsernermit lottornermillu iluanaarutit agguataaqinnissaannik suliniaqatigiiffinni isumaginnittuusuni suliart ingerlanneqarneri pillugit Inatsisartut inatsisaat malittarisassanik imaqaanngilaq, soorlutaaq suliniaqatigiiffiit tapiissutinik agguataarinerinik nakkutiginninnissaq pillugu annikitsuinnarmik malittarisassanik aalajangiisoqarsimasoq.

#### b) Siunnersuut

Siunnersuutikkut meeqqat inuusuttullu peqatigiiffiinut atugassanngortitat agguataarnissaannik suliassat tamakkerlugit, Inatsisartut ukiakkut 2004-mi ataatsimiinneranni (UKA 2004/68-imi) aalajangiunneqartutut, Sorlammut suliassanngortinneqarput.

Tipsernermit lottornermillu iluanaarutit agguataarnissaannik suliassamik tiguserusuttuupput suliniaqatigiiffiit namminersortut Kalaallit Nunaanni Timersoqatigiit Kattuffiat, Team Grønland aamma Sorlak. Suliniaqatigiiffiit ilaat ataaseq arlallilluunniit kingusinnerusukkut suliamik, soorlu suliniaqatigiiffiup allanngortiterneranut ilaatillugu tigungminnikkumajunnaarsinnaanerat pisinnaavoq, imaluunniit allanik, soorlu suliniaqatigiiffiup iluani annertuunik sivisuunillu isumaqatigiinngittoqarneranik patsiseqartumik suliassamik naammassinissinnaajunnaarsinnaallutik. Suliassat taama ittut

isumagineqarsinnaanissaannut taamatut pisoqarnerani Naalackersuisut allaffissornermik tigusinninnissaminnik periarfissinneqarnissaat siunnersuutigineqarpoq.

Nukinnik atuinerup annikillisarniarnissaa siunertaralugu Tipsernermit iluanaarutit pillugit ma-leruagassiisartussatut suleqatigiissitaliap atorunnaarsinneqarnissaa siunnersuutigineqarpoq. Suleqatigiissitami ataatsimiinnermi siunnersuut oqaluuserineqarsimavoq, ilaasortallu atorunnaarsitsineq akerliliffiginiangilaat. Naalackersuisut isumaqarput tipsernermit iluanaarutit pillugit maleruagassiisartussatut suleqatigiissitaq Namminersornerullutik Oqartussat tipsernermit lottornermillu iluanaarutit immikkoortortaanik tigusineranni pisariaqartuullunilu kinguneqarluartumik peqataaqataasimasoq. Peqatigiiffinni il.il. aammalu Namminersornerullutik Oqartussani tunngaviatigut allaffissornikkut iliuuserisartakkat il.il. ilikkaakkiartorsimani ilutigalugit nukit Tipsernermit iluanaarutit pillugit maleruagassiisartussatut suleqatigiissitamut atatillugu atorneqartut siunertamut tulluarnerusumut atorneqarsinnaanerit Naalackersuisut isumagaat, ilaatigut meeqqat inuusuttullu peqatigiiffiitut aningaasat agguanneqarnerinik suliamik Sorlaap tigusinerani ikiuunnermut atorneqarsinnaammata. Tipsernermit iluanaarutit pillugit maleruagassiisartussatut suleqatigiissitaq suliaasa pingaarnertit malittarisassat il.il. atuutsilerinerinut atatillugu tusarniaanernik ingerlanneqartunik taarserneqarsinnaanerit Naalackersuisut naliliffigaat, sorlulusooq agguassinerit pillugit apeqqutinik aalajangersimasunik, soqutiginnittuusunit saqqummiunneqartunik oqallisiginninnissamik Naalackersuisut qaqugukkulluunniit piareersimassat.

Tamatuma saniatigut pisortat ingerlatsineranni suliaassanik ingerlatsisarneq pillugu Inatsisartut inatsisaat aamma pisortat ingerlatsineranni tamanut saqqummiussisussaataaneq pillugu Inatsisartut inatsisaat tipsernermit lottornermillu iluanaarutinit agguassisarneq pillugu Inatsisartut inatsisaannut atuuttuusut sulianut atorneqarsinnaanera siunnersuutigineqarpoq. Taamaalilluni tipsernermit lottornermillu iluanaarutinit agguassisarneq pillugu suliarisat, Kalaallit Nunaanni Timersoqatigiit Kattuffiannit, Team Grønlandimit imaluunniit Sorlammit suliarineqartut pisortani sammisat suliarineranni nalinginnaasumik allaffissornermi ingerlatsivinni inatsisitigut piunasaqaatinut atasuuneri aalajangiunneqarput.

Tipsernermit lottornermillu iluanaarutit, Inatsisartut aningaasanut inatsisaanni isertitatut ani-ngaasartuutitullu nalunaarsorneqartutut pisortanit aningaasaataanerit aallaavigalugu malittari-sassiat aningaasat agguataarnerinut naleqqiullugu Naalackersuisut nakkutillinissaannik periarfissiisut siunnersuutigineqarput. Ilaatigut suliniaqatigiiffiit, tipsernermit lottornermillu iluanaarutinit agguassinermik isumaginnittuusut Naalackersuisunut ukiumoortumik nalunaarusiatik, ukiumi ilivitsumi siuliani aningaasat agguataarneri pillugit nalunaarusiamik ilanngussaqaarlutik nassiuttassavaat.

Tamatuma saniatigut paasiuminartuunissaat eqqarsaatigalugit Naalackersuisunut pisinnaatitsinerit pillugit malittarisassat malittarisassamut ataatsimut katinneqarnissaat siunnersuutigineqarput, soorluttaaq pisinnaatitsinerit suussusiisa erseqqissarnissaat siunnersuutigineqarlutik.

Kiisalu oqaatsit atukkat tungaatigut teknikkikkullu allannguuteqarnissamik siunnersuuteqartoqarpoq.

Allannguutissatut siunnersuutigisat ataatsimoortillugit annertussusaannik isiginninnermi immikkoortortamut nutaamik Inatsisartut inatsisissaannut siunnersuuteqarnissartik Naalakkersuisut eqqortuutinnerpaasimavaat. Taamaalilluni Inatsisartut inatsisaata pisariitsumik atoruminarnerunissaa isumannaarneqassaaq.

### *3. Pisortanut aningaasaqarnikkut allaffissornikkullu kingunerisassat*

Suleqatigiissitami ilaasortanut akissarsiaqartitsinermut aamma angalanernut aningaasartuutit amerlinerisa taarsertarnerinut aningaasartuutit sipaarfiunerisa kingunerisaannik Tipsernermit iluanaarutit pillugit maleruagassiisartussatut suleqatigiissitap atorunnaarsinnissaanik siun-nersuuteqarneq ukiumut 5-10.000 kr.-nik annertussusilimmik sipaaruteqarfigineqartassasoq naliliiffigineqarpoq. Sipaarutigineqartut kontomi pingaarnermi 40.14.28-mi, Dansk Tipstjenestip sinneqartoortaanit Kalaallit Nunaata pissarsiaanit tapiissutit, iluanni agguaateqqinneqartassapput.

Kiisalu Tipsernermit iluanaarutit pillugit maleruagassiisartussatut suleqatigiissitap atorunnaar-sinnerata allaffissornikkut nukinnik annikitsuinnarmik atuisinnaassuseqartitsinissaa nalilerneqarpoq. Tamanna ilutigalugu meeqqat inuusuttullu peqatigiiffiinit aningaasanik agguaassisarnermik suliasamik tamakkiisumik Sorlammut nuussisoqarneratigut allaffissornikkut annikinnerusunik oqilisaasoqassaaq. Namminersornerullutik Oqartussanut allaffissornermi sipaarutaasut 2006-imut aningaasanut inatsimmi ukiunullu missingersuusiorfiusunut ukiumut suliarisinnaasamut 0,1-imik minnerusutut naliliiffigineqarput. Tipsernermit lottornermillu iluanaarutit agguataarnerinik annertunerusumik nakkutiginninnikkut allaffissornikkut sipaarutaasut naleqqatigiissuserneqarnissaat naatsorsuutigineqarput.

### *4. Inuutissarsiuteqartunut il.il. aningaasaqarnikkut allaffissornikkullu kingunerisassat*

Siunnersuutip Sorlammut allaffissornikkut taasarialinnik kinguneqarnissaa naatsorsuutigine-qanngilaq, suliniaqatigiiffiup meeqqat inuusuttullu peqatigiiffiinit qinnuteqaatinik suliaqarneq pillugu allaffissornerup ilarujussuanik tigungmisaqareenera pissutigalugu.

Tamatuma saniatigut siunnersuutip aningaasaqarnikkut imaluunniit allaffissornikkut kinguneqarnissaa naatsorsuutigineqanngilaq.

### *5. Avatangiisinut pinngortitamullu tunngatillugu kingunerisassat*

Siunnersuut avatangiisinut pinngortitamullu tunngatillugu sunniuteqassanngilaq.

*6. Innuttaasunut allaffissornikkut kingunerisassat*

Siunnersuut innuttaasunut allaffissornikkut sunniuteqassanngilaq.

*7. Naalagaaffeqatigiinnermut aamma namminersulernissamut tunngasut*

Siunnersuut Naalagaaffeqatigiinnermut imaluunniit namminersulernissamut ingerlariaqqinnermut atatillugu sunniuteqartussatut isumaqarfigineqanngilaq.

*8. Oqartussaasunik suliniaqatigiiffinnillu tusarniaaneq*

Siunnersuut qullersaqarfinnut suliniaqatigiiffinnut makkununga tusarniaaffigineqarsimavoq:

Sorlak, Sorlaap Tipserneq pillugu ataatsimiititaliaa, SUKORSEQ, Spejderit Kattuffiat, K.I.K., S.I.S, Savaatillit Inuusuttut Peqatigiit, Sanningasoq Tungujortup Inuusuttai Paamiut, NAIP-p inuusuttai, Inuusuttut Peqatigiit Upernavik Kujalleq, Meeqqat Inuusuttullu Peqatigiiffiat "Kattutta", Meeqqat Inuusuttullu Peqatigiiffiat, Atassutip Inuusuttai, Upernavimmi Atassutip Inuusuttai, Meeqqat Inuusuttullu Peqatigiiffiat "Ikinngutivut", Ukkusissani Kalattoortartut Peqatigiiffiat U.K.P., Pikialarneq, Det Hvide Kors- Det Grønne Bånd, Inuit Youth International, Kalaallit Nunaanni Timersoqatigiit Kattuffiat, Team Grønland, Aningaasaqarnermut Pisortaqarfik,

Akilerartarnermut Pisortaqarfik, Ilaqutariinnermut Pisortaqarfik, Ineqarnermut Attaveqarnermullu Pisortaqarfik.

Aningaasaqarnermut Pisortaqarfik paasititsivoq nalinginnaasumik oqaaseqaatini immikkoortut pingajuanni pisortanut aningaasaqarnikkut allaffissornikkullu kingunerisassanut tunngasumi konto pingarneq 40.14.28 pillugu taaguut eqqortoq atornerarsimangitsoq aamma Tipsernermit iluanaarutit pillugit maleruagassiisartussatut suleqatigiissitap atorunnaarsinnera konto pingarneq 40.14.28-mi taamaallaat agguasseqqinnermik kinguneqartussaasoq. Tamanna naapertorlugu nalinginnaasumik oqaaseqaatini immikkoortut pingajuanni oqaaseqatigiit suilliit Kultureqarnermut, Ilinniartitaanermut, Ilisimatusarnermut Ilageeqarnermullu Pisortaqarfiup allanngortippai.

Suliassat suliarineqartarnerat pillugu inatsit aamma tamanut saqqummiussisussaataaneq pillugu inatsit eqqarsaatigalugit sulianik ingerlatsinerup qanoq ingerlanneqartarnissaa pillugu nassuiaasoqarnissaa Inuusutissarsiornermut, Nunalerinnermut Suliffeqarnermullu Pisortaqarfimmit maqaasineqarpoq, soorlu aamma naammagittaalliuuteqarnissaaq pillugu maluarugassaliortoqarnissaa kaammattuutigineqartoq. Tassunga atatillugu oqaatigineqassaaq tipsernermit lottornermillu iluanaarutininik agguassisarnermut tunngasut suliassat kattuffinnut pingasunut pineqartunut sapinngisamik tunniunneqarnissaat siunnersuummi

siunertarineqarmat. Taamaattumik taakku sulianik suliarinnittarnerisa kattuffiit aaqqissuussinissaat pillugit malittarisassanik aalajangersaannginnissaq naleqqunnerpaatut isigineqarsimavoq, tassunga ilanngullugu tipsernermit lottornermillu iluanaarutinik agguaassisarnermi aalajangiinerit pillugit naammagittaalliuutit pillugit suleriaaseqarnissamut kattuffiit aaqqissuussinerat. Aammattaaq siunnersuummi matumani killiliussat iluanni suliat suliarinerannut suliaasat suliarineqartarnerat pillugu inatsimmi piumasaaqaatit uteqqinneqarnissaat naleqquttutut isigineqarsimannilaq.

Inuussutissarsiornermut, Nunalerinermut Suliffeqarnermullu Pisorta qarfiup kaammattuutigaa peqatigiiffiit kattuffiillu naalakkersuinermit ingerlatsisuunngitsut kulturikkut, siulersuisutigut tamanullu iluaqutissanik ingerlatsineranut, siunnersuummi § 1, imm. 1, nr. 4 naapertorlugu tapiissutisisinnaassasut. Kultureqarnermut, Ilinniartitaanermut, Ilisimatusarnermut Ilageeqarnermullu Pisorta qarfiup oqaatigisinnaavaa peqatigiiffiit kattuffiillu siunnersuummi § 1, imm. 1, nr. 1-3-mut ilaanngitsut (timersorneq kiisalu meeqqanut inuusuttunullu peqatigiiffiit) siunnersuummi § 1, imm. 1, nr. 4 malillugu ingerlatsineranut tapiissutissanik qinnuteqarsinnaasut, tamanut iluaqutissat pillugit aalajangersakkami siunertat taaneqartut allat kattuffinnit naammassineqarsimappata.

Kalaallit Nunaanni Timersoqatigiit Kattuffiata allaffissornikkut pisariillisaanissamik siunnersuummi siunertaq naammagisimaarpaa. Suliassalli suliarineqartarnerat pillugu inatsimmi aalajangersakkat kattuffiup namminersortup malinninnissaanik peqqusineq silatusaarnerunersoq kattuffiup qularutigaa. Kalaallit Nunaanni Timersoqatigiit Kattuffiata isumaa naapertorlugu pingaaruteqarpoq suliassanik ingerlatsineq kattuffiup eqqortutut naapertuuttutullu isigisaa kattuffimmit atornerpat. Tassunga oqaatigineqassaaq sulianik suliarinninnerup qanoq aaqqissuunneqarnissaa pillugu suliassat suliarineqartarnerat pillugu inatsimmi aalajangersarneqarsimannngimmat. Akerlianilli inatsisartut inatsisaat sulianik suliarinninnissaq pillugu tunngaviatigut piumasaaqatinik arlalinnik imaqarpoq, qinnuteqartut eqqarsaatigalugit aalajangiussimaneqaannarnissaat eqqortutut isigineqartunik, suliassat kattuffimmik namminersortumik ingerlanneqaraluarpataluunniit. Suliassat pisortanit ingerlanneqaratik kattuffinnilli namminersortunit isumagineqarpata qinnuteqartut inatsisitigut inissisimanerat soq isumannaannerussanersoq tunngavilersoruminaappoq.

Kattuffiup ilaasortarinngisaminit qinnuteqaatinik suliarinninnissamut piumasaaqaatip tunuliaqutaa Kalaallit Nunaanni Timersoqatigiit Kattuffiata paasisinnaanngilaa. Kalaallit Nunaanni Timersoqatigiit Kattuffiata klubbit ilaasortaasut nakkutigalugillu qanoq iliuuseqarfigisinnaavai, kisiannili ilaasortaannngitsunit qinnuteqaatit malinnaaffiginissaannut ajornakusoortitsissalluni. Aammattaaq nalilerneqassaaq piumasaaqaat taanna kattuffiup inatsisaanut naapertuut-tuunnersoq. Tassunga atatillugu oqaatigineqarsinnaavoq ilaasortaannngitsunit qinnuteqaatit aamma Kalaallit Nunaanni Timersoqatigiit Kattuffiannit suliarineqarnissaannut piumasaaqaat nutaajunngimmata aamma timersornernut tamanit peqataaffigineqarsinnaasunut agguaassinissamik suliap kattuffimmut tunniunneqarnerata tamanna kingunerisimallugu. Timersornernut tamanit peqataaffigineqarsinnaasunut qinnuteqaatit suliarinerat pillugu suliap Kalaallit Nunaanni Timersoqatigiit

Kattuffiata aamma Naalakkersuisut akornanni avinneqarnissaa allaffissornikkut naleqqutissangilaq aamma Kalaallit Nunaanni Timersoqatigiit Kattuffiannit agguaanneqartussat annertussusaat ikilisillugit. Siunnersuummi kapitali 3-mi nammineq ilaasortarisanut aamma ilaasortarinngisanut Kalaallit Nunaanni Timersoqatigiit Kattuffiannit malinnaanissamut suut periarfissaasut iliuuserisinnaasallu atorneqarsinnaanersut aamma takuneqarsinnaapput.

Akilerartarnermi Pisortaqarfik aamma Ilisimatusarfik siunnersuummut oqaaseqaateqanngillat.

Peqatigiiffiit kattuffiillu arlallit tusarniaanermi akissuteqarsimangillat, UKA 2004/68-illi suliarineqarnerani meeqqat inuusuttullu peqatigiiffiit tipsernermit lottornermillu ilua-naarutininik Sorlaap agguaaassisarnissamut piginnaatinneqalernissaa taakku ilarpassuisa isumaqatigisimavaat, tamanna ilaatigut takuneqarsinnaavoq suliami pineqartumi Kultureqarnermut, Ilinniartitaanermut Ilageeqarnermullu Ataatsimiititaliap isumaliutissiissutaani.

## **Inatsisissatut siunnersuummi aalajangersakkanut ataasiakkaanut oqaaseqaatit**

### *§ 1-imut*

Siunnersuummi imm. 1-imi Tipsernermit lottornermillu iluanaarutinit agguaaassisarneq pillugu Inatsisartut inatsisaat nr. 13, 11. novembari 2000-imeersumi § 1, imm. 1-imik tunngaveqar-poq.

Oqaaseq "aningaasat" oqaatsitigut sianigisariaqakkat pissutigalugit oqaatsimik "pissarsiassat"-nik taarserneqarpoq. Aammattaaq oqaatsitigut sianigisariaqakkat pissutigalugit oqaaseq "agguaattassavaat" "agguaatissavaat"-mik taarserneqarpoq. Pineqartunit malittarisassap imarisaanut naleqqiullugu pissutsinik allanguiniarnermik anguniagaqartoqanngilaq.

Oqaatsit "§§ 6-7 malillugit aqutsinermut aningaasartuutit tapiissutaasinnaasut ilanngaatigereerlugit" peerneqarnissaat siunnersuutigineqarpoq, oqaatsit pinnguaatit, eqqorniaasitsinerit eqquiniunnerillu ilaat pillugit inatsisini atorneqarfiini aningaasartuutit taamatut ittut nalinginnarmik iluaqutaasussatut isigineqarsinnaannginneri pissutigalugit.

Kiisalu oqaatsit "meeqqat inuusuttullu pillugit siunertanut" immikkoortortami allaffissornikkut ingerlatsineq eqqarsaatigalugu "meeqqat inuusuttullu peqatigiiffii"-nik taarserneqarnissaa siunnersuutigineqarpoq, meeqqat inuusuttullu peqatigiiffii kisimik pinnatik aammali allat meeqqat inuusuttullu immikkoortortani sammisanut tamanut iluaqutaasussatut siunertaqartunut immikkoortitanit qinnuteqarsinnaanerat pissutigalugu.

Malittarisassami pinnguaatit, eqqorniaasitsinerit eqquiniunnerillu ilaat pillugit inatsisini piumasaqaatit najoqqutaralugit aalajangiunneqarpoq tipsernermit lottornermillu iluanaarutit tamanut iluaqutaasussamik taamaallaat agguaanneqarsinnaasut, tassalu timersornermut, meeqqanut inuusuttunullu siunertanut, kiisalu nalinginnarmik iluaqutissanut allanut, taakkununga ilanngullugit kulturimut tunngasunut, inunnik qaammarsaanermut, nappaatinik akiuiniarnermut pinaveersaartitsinernullu, inooqatigiinnermut tunngasunik siunertaqartunut, asimiisitsinissanut siunertaqartunut aamma tamanut iluaqutaasussamik ilisimatusarnermut.

Siunertanut nalunaakkanut procentikkaarlugu agguataarinissamik siunnersuutigisag Tipsernermit lottornermillu iluanaarutinit agguaassisarneq pillugu Inatsisartut inatsisaat nr. 13, 11. november 2000-imeersumit ingerlateqqinneqarpoq.

Imm. 2-mi aalajangersagaq Tipsernermit lottornermillu iluanaarutinit agguaassisarneq pillugu Inatsisartut inatsisaannik allanngortitsinissaq pillugu Inatsisartut inatsisaat nr. 4, 21. maaji 2004-mit ingerlateqqinneqarpoq. Aalajangersagaq najoqqutaralugu aningaasat Kalaallit Nunaanni tipsernermit lottornermillu naalagaaffimmut akitsuutip 2004-mi atorunnaarsinneqartup annertoqatai siunertanut imm. 1-imi taaneqartunit allaanerusunut atorneqarsinnaapput. Kalaallit Nunaanni tipsernermit lottornermillu iluanaarutinit kaaviiartitsinermit qallunaat naalagaaffiannut akitsuutinik 2004 aallarnerfigalugu akiliisoqartarunnaarsitsisumik pinnguaatit, eqqorniaasitsinerit eqquiniunnerillu ilaat pillugit qallunaat inatsisaata 26. marsi 2003-mi allanngortinneqarnera malittarisassamut tunngaviuvoq. Akerlianik naalagaaffimmit ataatsimoortumik tapiissutit aningaasat annertoqqataannik ikilisinneqarput. Aningaasanik Kalaallit Nunaanni tipsernermit lottornermillu naalagaaffimmut akitsuutip 2004-mi atorunnaarsinneqartup annertoqataannik siunertanut imm. 1-imi taaneqartunit allaanerusunut atorneqarsinnaanerit nunatta karsiata amigartooruteqannginnissaa isumannaarniarlugu imm. 2-mi periarfissiisoqarpoq.

Imm. 3-mut siunnersuut Tipsernermit lottornermillu iluanaarutinit agguaassisarneq pillugu Inatsisartut inatsisaat nr. 13, 11. november 2000-imeersumit tunngaveqarpoq. Malittarisassani imm. 1 oqaatsit atorneqartutigit allannguutit eqqaassanngikkaanni § 3-p taaneqartumit ingerlatitseqqiineruvoq. Imm. 2 nutaajuvoq, imarisaminili Tipsernermit lottornermillu ilua-naarutinit agguaassisarneq pillugu Inatsisartut inatsisaat nr. 13, 11. november 2000-imeersumi § 1, imm. 1-imi oqaatsinut "§ 3-lu malillugu tapiissutaasinnaasut ilanngaatigereerlugit"-nut assingulluni.

Tipsernermit lottornermillu iluanaarutinit ukiumoortumik aningaasaateqarfimmut akiliisartoqarnissaa taarsiullugu nunami maani allatigulluunniit illulioriaatsikkut nutaaliortumik kultureqarnikkut aammalu timersornermut tunngasunik sanaartornermut aningaasaateqarfiup aningaasatigit tapiisinnaanerit Najukkanut Sanaartugassanullu Aningaasaateqarfimmit Naalakkersuisut manna tikillugu pisarnermisut ilaatigit isumaqatiginninniarsinnaanerit malittarisassaq nassataqarpoq. Tamatuma saniatigit tamanut iluaqutaasussamik isumaginnittunik isumaqatiginninniartarfinnik allanik assingusunik isumaqatiginninniartarfigisaqarnissamut malittarisassaq periarfissamik ammaavoq.



## § 2-mut

Siunnersuummi § 2, imm. 1, nr. 1-ip aamma 2-p Tipsernermit lottornermillu iluanaarutinit ag-guaassisarneq pillugu Inatsisartut inatsisaat nr. 13, 11. november 2000-imeersumi § 2, imm. 1 aamma 2 assigivai. Timersornernut tamanit peqataaffigineqarsinnaasunut, kiisalu piukkunnaatillit pikkorinnerillu timersornerinut atugassanngortitat tunniunneqartartut agguanneqarnerinik Kalaallit Nunaanni Timersoqatigiit Kattuffiata aamma Team Grønlandip isumaginnittuu-nissaannik malittarisassat nassataqarput.

Siunnersuummi § 2, imm. 1, nr. 3 nutaajuvoq, meeqqat inuusuttullu peqatigiiffiitut atugassanngortitat agguanneqartarnerini suliasartanik tamanik Sorlaap isumaginnittunngortitaanerani nassataqarluni.

Nr. 1-3-mi suliniaqatigiiffiit tipsernermit lottornermillu iluanaarutini agguaaassinerminni Naalakkersuisunit misissugarineqarlutillu nakkutigineqartuupput, siunnersuummi §§ 5 aamma 6 innersuussutigineqarput, sammisanillu inatsimmut matumunnga ilaasunut suliaqarnerminni ilaatigut suliasanik isumaginninneq pillugu inatsimmi malittarisassat najoqqutarissallugit, siunnersuummi § 3 innersuussutigineqarpoq. Tamatuma saniatigut suliniaqatigiiffiit Inatsisartut inatsisaanni malittarisassat allat, kiisalu immikkoortotami nalunaarutit atuuttuu-sut malittarisassiallu malittarisassavaat.

Nr. 1-imi aamma 3-mi suliniaqatigiiffiit taaneqartut tipsernermit lottornermillu iluanaarutini agguaaasseqqinnermut atatillugu peqatigiiffinit il.il., suliniaqatigiiffinni ilaasortaangitsunit suliasat (qinnuteqaatit) suliarisassavaattaq. Taamaattumik agguaaassinermik malittarisassat isumaqatigiissutiginerini il.il. inunnit, peqatigiiffinit il.il. suliniaqatigiiffinni ilaasortaangitsunit qinnuteqaatinik takkuttoqarsinnaanera pisariaqartumik sianigineqartassapput.

Nr. 4 Tipsernermit lottornermillu iluanaarutinit agguaaassisarneq pillugu Inatsisartut inatsisaat nr. 13, 11. november 2000-imeersumi § 2, imm. 3-mut assinguvoq, taamaallaat meeqqat inuusuttullu peqatigiiffiitut agguaaassisarneq nr. 3-p nassatarisaanik Sorlammit isumagineqalerneru eqqaassanngikkaanni.

Imm. 2 najoqqutaralugu § 2, imm. 1, nr. 1-3-mi atugassanngortitanik ingerlatitseqqinnermik allaffissorneq Naalakkersuisut tigusinnaavaat suliniaqatigiiffiup tamanna pillugu Naalakkersuisut qinnuteqarfigippagit, imaluunniit suliniaqatigiiffiit suliasamik isumaginnissinnaajunnaarneranik pingaarutilimmik aalajangersimasumillu tunngavilersukkamik ilimaginnittoqarpat.

Malittarisassatut siunnersuutigineqartoq tipsernermit lottornermillu iluanaarutit ataavartumik allaffissornerup tungaatigut ingerlattuarinissaannik isumannaariniarnermik siunertaqarpoq. Assersuutigalugu suliniaqatigiiffimmi allannguuteqarnerup nassatarisaanik Kalaallit Nunaanni Timersoqatigiit Kattuffiata, Team Grønlandip imaluunniit Sorlaap tipsernermit lottornermillu iluanaarutini

agguaassisarnermik suliaqarunnaarfini malittarisassaq ilaatigut  
atuutsinneqarsinnaavoq.

Suliniaqatigiiffiit suliassamik isumaginnissinnaajunnaarneranik pingaarutilimmik  
aalajangersimasumillu tunngavilersukkamik ilimaginnittoqarneranik pissutsinut  
Naalakkersuisut tipsernermit lottornermillu iluanaarutininik agguassinermik  
allaffissornermik tigusaqarfiinut tamakkiisumik allattuiffimmik  
inissitsiterisoqarsinnaanngilaq. Assersuutigalugu naatsorsuuserinermi imaluunniit  
allaffissornermi pissutsini qitiusutut piumasaqaatinik malittarinninnissamik  
suliniaqatigiiffimmu Naalakkersuisut arlaleriarlutik qisuariarfigineqanngitsumik  
saaffiginnittarsimaneranni, nutaanillu saaffiginnissutit pissutsinik  
pitsaangorsaanissaannik kinguneqartitaqarnermik naatsorsuutigisaqarfiumngitsuni  
malittarisassaq atugaalersinneqarsinnaavoq. Aammattaaq suliniaqatigiiffiup  
tipsernermit lottornermillu iluanaarutininik agguassinermik suliaanut  
sunniuteqarsinnaasunik sulianiaqatigiiffik ilumini isumaqatigiinngissutsinik  
pingaaruteqarlutillu sivisuumik ingerlatsiviusimaffiisigut malittarisassaq  
atugaalersinneqarsinnaavoq. Aammalu suliniaqatigiiffiup  
atuukkunnaavissimaneranik pissutsit najoqqutaralugit isigineqarsinnaanera  
malittarisassamut ilanngunneqarsinnaavoq.

#### *§ 3-mut*

Suliassat, Inatsisartut inatsisaannut matumunnga ilaasut imaluunniit malittarisassat  
taanna naapertorlugu akuersissutigineqartut najoqqutaralugit, suliniaqatigiiffinnit  
siunnersuummi § 2, imm. 1, nr. 1-3-mi taaneqartutut isumagineqartut pisortat  
ingerlatsivianni suliassat suliarineqartarnerat aamma tamanut  
saqqummiussisussaataitanera pillugit inatsisinit aalajangiunneqartut killissarisasa  
iluini pisarnissaat malittarisassap nutaajusup nassatarai.

Taamaalilluni inatsisitigut ingerlatsinermik piumasaqaatit tunngaviusut il.il.  
tipsernermit lottornermillu iluanaarutininik agguassisarneq pillugu suliassat tamarmik  
suliarinerini atorineqartarnissaat isumannaarneqassaaq, naak suliniaqatigiiffinnit  
namminersortunit Kalaallit Nunaanni Timersoqatigiit Kattuffiannit, Team  
Grønlandimit aamma Sorlammit suliassat isumagineqartaraluartut.

#### *§ 4-mut*

Siunnersuut Tipsernermit lottornermillu iluanaarutininik agguassisarneq pillugu  
Inatsisartut inatsisaat nr. 13, 11. november 2000-imeersumi § 8-mit tunngaveqarpoq,  
taamaalillutik tapiiffigitinnissamik qinnuteqartut Kalaallit Nunaanni  
najugaqartussaassallutik. Taamaattorli tipsernermit lottornermillu iluanaarutininik  
agguaassivigineqarsinnaanermut inatsisilerinermi angerlarsimaffeqarnissamik  
piumasaqaatip peqatigiiffinnut, suliniaqatigiiffinnut, suliffeqarfinnut,  
pisortaqarfinnut il.il. tunngasuunissaa erseqqissarneqassasoq siunnersuutigineqarpoq,  
inuilli tipsernermit lottornermillu pissarsisinnaassagunik nunami maani  
najugaqartariaqassallutik. Taamatuttaaq erseqqissarneqassasoq

siunnersuutigineqarpoq Team Grønland inunnut Kalaallit Nunaata avataani najugaqartunut tapiissuteqarsinnaasoq, Naalakkersuisut tiguisissat timersortartut pikkorinnertut piukkunnaatilittullunniit akuersissutigisimappatigit.

Tipsernermit lottornermillu iluanaarutit Kalaallit Nunaata pissarisaanik nunami maani inuit, peqatigiiffiit il.il. taamaallaat atugaqarsinnaanissaannik malittarisassaq isumannaariniarpoq. Taamaalilluni nunami maani aallaaveqarlutik sammisaritinneqartut tapersorsorneqassammata.

### *§ 5-imut*

Malittarisassiaq nutaajuvoq, Naalakkersuisut tipsernermit lottornermillu iluanaarutit aggu-aassisarnerit Kalaallit Nunaanni Timersoqatigiit Kattuffiannit, Team Grønlandimit aamma Sorlammit ingerlatsivigineqartut misissugaralugillu nakkutiginnissaannik periarfissaannik isumannaarisussaalluni.

Imm. 1, ilaatigut Tipsernermit lottornermillu iluanaarutit aggu-aassisarneq pillugu Inat-sisartut inatsisaat nr. 13, 11. november 2000-imeersumi § 10, imm. 1-imik ingerlatitseqqiffiusup § 2, imm. 1, nr. 1-3-mi suliniaqatigiiffiit taaneqartut kingusinnerpaamik 1. juunimi Naa-lakkersuisunut ukiumut siulianut naatsorsuiffimmut naatsorsuutiminnik kukkunerisiorneqarsimasunik naatsorsuutinullu atukkanik allanik nassitsisarnissaannik aalajangersaavoq. Naatsorsuutit ukiumi ilivitsumi siuliani atugassanngortinneqartunut kukkunerisuiusumit pisortanit akuersisamit imaluunniit kukkunerisuiusumit nalunaarsugaasumit naatsorsuutit kukkunerisiorneqareernerinik atsiorerinillu nalunaarsorerinik ilanngussivigineqassapput.

Naatsorsuutinut atukkanut allanut pineqartunut isumagineqarput naatsorsuuserinermi allattaaviit, naatsorsuutinut allakkiat, ukiumoortumik nalunaarusiat il.il. akerlianilli naatsorsuutinut ilanngussat aalajangersakkamut ilaatinneqanngillat. Naatsorsuutit naatsorsuutinullu atukkat allat kingusinnerpaamik 1. juunimi nassinneqassapput, taakku suliniaqatigiiffiit piginnaatillugit oqartussaasuinit akuersissutigineqarsimanngikkaluarpataluunniit.

Imm. 2 najoqqutaralugu suliniaqatigiiffinnut siunissami akiliutit Naalakkersuisut kinguartissinnaavaat imm. 1-imi taaneqartut naatsorsuutit nalunaarutaasullu piffissaq eqqorlugu takkutinnigippata, imaluunniit § 1, imm. 1-imi siunertanut taaneqartunut atugassanngortitat atorsimannginnerinik Naalakkersuisut paasisaqarpata. Akiliutinik kinguartitsineq taamaatinneqassaaq naatsorsuutit tamatuma kingunerisaanik nassinneqarpata imaluunniit siunertanut naapertuuttumik tipsernermit lottornermillu iluanaarutit atorneqarnerannik isumannaarissutinik pilersitsisoqarpat. Akiliutit kinguarterinut atatillugu Naalakkersuisut atugassanngortitanik agguasseqqinnermik allaffissornermik tiguisigallarsinnaanerat siunnersuutigineqarpoq.

Tipsernermit lottornermillu iluanaarutit ingerlatsiviunerinik misissuinissamik nakkutiginnissamillu Naalakkersuisut periarfissaanni naatsorsuutit,

naatsorsuutitut atukkat allat nalunaarsuutillu pingaaruteqartuupput, taamaattumillu taakku piffissaq eqqorlugu takkuttarnissaat pingaaruteqartuuvoq. Atugassannortitat § 1, imm. 1-imi nalunaarneqartutut siunertanut atorneqanngippata malittarisassanik unioqqutitsisoqassaaq, taamaattumillu Naalakkersuisut akuleruttussaapput siunissamilu akiliutigisassanik kinguartitaqarsinnaallutik. Aalajangersimasumik naliliisoqareernerup kingornatigut malittarisassanik erseqqissumik pingaarutilimmillu unioqqutitsisoqarnera taamatut akuliuttoqarneranut tunngaviussaaq. Pisuni erseqqissumik pisoqarfiunngitsuni pingaarutikinnerusunilu taarsiullugu Naalakkersuisut siunissami suleriaatsimik allannortitsinissaannik suliniaqatigiiffiit peqqussuteqarfigisinnaavaat. Pissutsit iluarsineqarnerisigut, tassalu naatsorsuutit il.il. Naalakkersuisunut nassinneqarnerisigut, imaluunniit siunissami suliniaqatigiiffiit § 1, imm. 1-imi siunertanut nalunaarsorneqartunut atugassannortitanik atugarinninnerinik isumannaarinerinik pissarsinermi akiliutit kinguarterneri taamaatinneqassapput.

Akiliutit kinguarternerinut atatillugu atugassannortitanik agguasseqqinnermik isumagininnermik Naalakkersuisut tigumminnikkallarnissaminnik aalajangiussaqarsinnaapput, taamaalillutik tipsernermit lottornermillu iluanaarutinit tapiissutisartut kinguarternermit attorneqannginniassammata.

#### *§ 6-imit*

Malittarisassiaq nutaajuvoq, Naalakkersuisut tipsernermit lottornermillu iluanaarutinit agguassinnermik atuinnermillu misissuinissaannik nakkutilliinissaannillu periarfissinneqarnissaannik isumannaarissalluni. Taamaalillutik tapiissutisartut, Kalaallit Nunaanni Timersoqatigiit Kattuffiat, Team Grønland aamma Sorlak qinnuteqarfigineqarnermikkut paasisutissanik tamanik Naalakkersuisunut nassitsisassapput, taakkununga ilanngullugit qinnuteqaatit pillugit paasisutissat, aalajangiussinerit, agguassinnermut najoqqutassat, ilaasortat amerlassusiat, akiliutit il.il.

Malittarisassaq suliniaqatigiiffinnik taaneqartunik pingasunik misissuinissamut nakkutiginninnissamullu atugassanik pingaaruteqartunik tamanik Naalakkersuisut noqqaassuteqarsinnaanerannik periarfissiivoq. Assigisaanittaaq tipsernermit lottornermillu iluanaarutinit tapiissutisat, tapiissutit suliniaqatigiiffimmit imaluunniit Naalakkersuisunit agguanneqartuuppata misissuinissamut nakkutiginninnissamullu atugassanik pingaaruteqartunik tamanik Naalak-kersuisut noqqaassuteqarsinnaapput.

#### *§ 7-imit*

Malittarisassaq Tipsernermit lottornermillu iluanaarutinit agguassisarneq pillugu Inatsisartut inatsisaat nr. 13, 11. november 2000-imeersumi § 11-mit ingerlatitseqqinneruvoq.

Malittarisassami tapiissutit akuerineqarsimasut tamakkiisumik imaluunniit ilaannakortumik uterteqquneqarsinnaanerisa qaqugukkut pisinnaanerat aalajangersarneqarpoq, tamannalu Naalakkersuisunit, Kalaallit Nunaanni Timersoqatigiit Kattuffiannit, Team Grønlandimit aamma Sorlammit ingerlanneqarsinnaalluni.

Qinnuteqaatip suliarinerani atugassatut paasissutissanik eqqunngitsunik qinnuteqartoq nalu-naaruteqarsimappat, tapiissuteqarnermut piumasaqaatit ataaseq arlallilluunniit eqquutsinneqanngippata, imaluunniit qinnuteqarfigisaq suliarisaasoq sinneqartoorutaappat akuerisaallutik tapiissutit tamakkiisumik imaluunniit ilaannakortumik uterteqquneqarsinnaapput.

### *§ 8-mut*

Malittarisassaq nutaajuvoq, tamakkunungalugu tunngasuni Naalakkersuisunut nalunaarusiornikkut malittarisassiorsinnaanermut piginnaatitsissutaalluni.

Imm. 1 ilaatigut Tipsernermit lottornermillu iluanaarutinit agguaassisarneq pillugu Inatsisartut inatsisaat nr. 13, 11. november 2000-imeersumi § 9, imm. 1-imik tunngaveqarpoq.

Malittarisassatut siunnersuut qinnuteqaatinut piumasaqaatit pillugit erseqqinnerusumik malittarisassiornissamut aalajangiisarnissamik Naalakkersuisunut periarfissiivoq. Suliarisat isumagineqarnerinut tunngavissatut assigiiaarsitsinermik pitsaassutsimillu isumannaarinissaq siunertaralugu qinnuteqaatinut assigiinngitsunik iluseqartunut piumasaqaatinik aalajangersaanis-samut malittarisassaq ammaassivoq.

Imm. 2 najoqqutaralugu § 2, imm. 1, nr. 1-3-mi suliniaqatigiiffiit taaneqartut avaqqullugit allat tipsernermit lottornermillu iluanaarutinit tapiissutisisimanerminni naatsorsuutunik nassius-sisarnissaannik Naalakkersuisut erseqqinnerusunik malittarisassiorsinnaapput.

Ilaatigut malittarisassaq tapiissutaasut annertussusaat naapertorlugit naatsorsuutitut piumasaqaatinik assigiinngitsunik, aammalu tapiissutisisut tapiissutisinertilli sioqqullugu naatsorsuusiornermik piumasaqaatinik aalajangersimasunik malittarisassaqarnissaannik aalajangiisinnaanissamik periarfissiivoq. Ilaatigut inunnut ataasiakkaanut tamanut iluaqutaasussatut siunertaqartunut immikkoortitanit ikinnerusunik tapiissutisisunut piumasaqaatit oqinnerusut inissitsiterfiginissaat eqqarsaatigineqarsinnaapput, aammalu kattuffinnut immikkut ittunut, Kalaallit Nunaanni Timersoqatigiit Kattuffiannut ilaasortaasunut annertunerusunik piumasaqaateqartoqarsinnaalluni. Kiisalu naatsorsuutitut piumasaqaatit pillugit erseqqinnerusunik malittarisassanik Naalakkersuisut aalajangersaasinnaapput.

Malittarisassaq ilaatigut tapiissutisiat annertussusaat naapertorlugu naatsorsuutunik kukkunersiornissamik piumasaqaatinik, aammalu tapiissutisisut kukkunersiornermik piumasaqaatinik aalajangersimasunik malittarisassaqareernissaat pillugu aalajangersaanissamut periarfissiivoq.

Imm. 3 najoqqutaralugu tipsernermit lottornermillu iluanaarutininik agguassisarneq pillugu atugassanngortitanik atuinermik paasissutissiinissaq pillugu Naalakkersuisut erseqqinnerusunik malittarisassanik aalajangersaasinnaapput.

Ilaatigut siunnersuut tipsernermit lottornermillu iluanaarutinit paasissutissiinermut aningaasartuutitut aningaasat amerlassusaannik atugaqarsinnaanermut killissarisunik aalajangiisunik Naalakkersuisut malittarisassanik aalajangersaaneritut pisinnaatitsivoq.

#### *§ 9-mut*

Inatsisartut inatsisaat 1. juli 2006-imi atuutilissasoq aammalu tamanna ilutigalugu Tipser-nermit lottornermillu iluanaarutinit agguassisarneq pillugu Inatsisartut inatsisaat nr. 13, 11. november 2000-imeersoq atorunnaarsinneqassasoq siunnersuutigineqarpoq.

Tamatuma saniatigut malittarisassat, tipsernermit lottornermillu iluanaarutininik agguassisarneq pillugu Inatsisartut inatsisaat nr. 13, 11. novembari 2000-imeersoq najoqqutaralugu aalajangiiffigineqartut, matumani imaluunniit Inatsisartut inatsisaanni allani najoqquaqarluni taarserneqarnissamik imaluunniit malittarisassat najoqqutaralugit atorunnaarsinneqarnissamik tungaannut atuutiinnarnissaat siunnersuutigineqarpoq.